

# **REGULAMENTO DO CENTRO DE INVESTIGACIÓN EN TECNOLOXÍAS DA INFORMACIÓN E AS COMUNICACIÓNS (CITIC) DA UNIVERSIDADE DA CORUÑA**

**Aprobado polo Consello de Goberno do 29/05/2018**

O Centro de Investigación en Tecnoloxías da Información e as Comunicacións (CITIC) é unha estrutura organizativa propia da Universidade da Coruña creado no ano 2007 para:

**Misión:** O CITIC é un Centro de Investigación en Tecnoloxías da Información e as Comunicacións, creado para aportar coñecemento científico e capacidades altamente cualificadas en beneficio da sociedade.

**Visión:** O CITIC quere ser un centro de investigación TIC de referencia nacional e con proxección internacional, recoñecido pola excelencia do coñecemento xerado no ámbito das tecnoloxías da información e das comunicacións e a transferencia efectiva de resultados á sociedade.

**Valores:** O CITIC ten como valores a integridade profesional, o compromiso para xerar ciencia de fronteira, a proactividade para colaborar coa industria, o liderazgo rexional, e o compromiso institucional coa sociedade.

Debido á expansión e ao desenvolvemento que experimentou o centro durante os últimos anos e o recoñecemento como centro de investigación singular de Galicia, faise necesario adecuar a súa estrutura organizativa á nova realidade e manter as súas finalidades. Para poder asumir estes obxectivos, a Universidade velará para que o Centro de Investigación en Tecnoloxías da Información e as Comunicacións dispoña dun equipamento idóneo e dun persoal cualificado, e baseará o seu funcionamento neste regulamento e nos preceptos que emanaren da lexislación vixente e dos acordos do Consello de Goberno da Universidade da Coruña que lle foren aplicables.

## TITULO I NATUREZA E FINALIDADES DO CITIC

### Artigo 1.- Denominación, réxime xurídico e adscrición

1. O CITIC é unha estrutura organizativa especializada da Universidade da Coruña (UDC) na investigación e transferencia en materia de tecnoloxías da información e das comunicacións.
2. O CITIC réxese por este regulamento, os Estatutos e normas propias da UDC que lle sexan de aplicación e máis pola lexislación xeral de procedemento, universitaria, científica e tecnolóxica que lle sexa de aplicación.
3. O CITIC está adscrito organicamente á Vicerreitoría de Política Científica, Investigación e Transferencia ou a vicerreitoría equivalente da UDC.

### Artigo 2.- Finalidades do CITIC

1. Constitúen finalidades do CITIC:
  - a) Dar soporte ás actividades en I+D+i aplicadas ás TIC dos grupos de investigación, das unidades e do persoal investigador individual da UDC que estean integrados no centro.
  - b) Desenvolver os métodos e as técnicas de apoio á investigación para mellorar e ampliar as prestacións, de acordo coas directrices da política científica da Universidade da Coruña.
  - c) Asesorar á comunidade universitaria en todo o que faga referencia ao seu ámbito de actuación, así como difundir os seus servizos.
  - d) Proporcionar formación técnica especializada no seu ámbito de actuación.
  - e) Contribuír como elemento activo nas relacións universidade-empresa e, en xeral, universidade-sociedade.
2. Para o logro destas finalidades, o CITIC desenvolverá cantas funcións e actividades resultaren necesarias de conformidade co disposto coa súa natureza e a normativa de aplicación.

## TITULO II ESTRUTURA E XESTIÓN

### Artigo 3.- Membros

1. Son membros do CITIC:

- a) O PDI e o persoal técnico investigador integrado nos grupos de investigación recoñecidos pola UDC e vinculados ao centro.
- b) O PAS da UDC adscrito ao centro.
- c) O PDI e o persoal técnico investigador vinculado individualmente ao centro.

2. Previa proposta do Comité de Dirección, corresponde á Vicerreitoría de Política Científica, Investigación e Transferencia vincular ao CITIC grupos de investigación, PDI e persoal técnico investigador.

3. A perda da condición de membro do CITIC prodúcese:

- a) Por renuncia expresa do grupo ou PDI ou investigador individual, que deberá ser aceptada polo Comité de Dirección.
- b) Por resolución expresa do/a reitor/a a proposta do Comité de Dirección en caso de incumprimento grave dos compromisos científicos, éticos ou financeiros.

En calquera caso, a resolución ou acordo a que se refire o parágrafo anterior deberá pronunciarse de forma expresa sobre a liquidación das relacións científicas e económicas existentes entre o antigo membro e o CITIC.

4. A dirección do CITIC deberá manter unha listaxe actualizada de membros do centro.

5. Os Grupos de Investigación vinculados ao CITIC son os relacionados no Anexo I.

### Artigo 5.- Órganos unipersoais e colexiados

1. O CITIC estrutúrase nos seguintes:

- a) Órganos colexiados
  - Comité de Dirección
  - Comité Asesor Externo
- b) Órganos unipersoais
  - Director/a
  - Sub-director/a

2. Os acordos adoptados polo Comité de Dirección ou polo director/a poderán ser recorridos enalzada de conformidade co disposto nos Estatutos da UDC.

### **Artigo 6. – O Comité de Dirección**

1. O Comité de Dirección estará constituído polo/a vicerreitor/a de Política Científica, Investigación e Transferencia ou persoa en quen delegue, que a presidirá; polo/a director/a do CITIC que actuará de vicepresidente/a; polo/a subdirector/a do CITIC que actuará de secretario/a; por cinco representantes dos grupos de investigación; un representante dos investigadores individuais (si houbese); e un representante do PAS adscrito ao centro.

2. Os membros representativos do Comité de Dirección serán elixidos/as de acordo co disposto no Regulamento Electoral Xeral da UDC. O seu mandato terá unha duración máxima de catro anos.

3. Son competencias do Comité de Dirección:

- a) Establecer, previo informe do Comité Asesor Externo, procesos de avaliación da actividade I+D+i do Centro.
- b) Establecer, previo informe do Comité Asesor Externo, a política de vinculación de grupos e persoal investigador ao CITIC.
- c) Establecer, previo informe do Comité Asesor Externo, os criterios de avaliación da actividade científica dos grupos e do persoal investigador vinculados ao centro.
- d) Aprobar os plans de actuación e as memorias do CITIC.
- e) Aprobar, a proposta da dirección, a solicitude de axudas ou subvencións así como a participación do Centro en proxectos ou contratos.
- f) Propor a realización de novas infraestruturas ou a mellora das existentes.
- g) Propor a modificación do Regulamento de Funcionamento do Centro.

4. O Comité de Dirección celebrará ao menos dúas sesións ordinarias cada ano, unha delas coincidente coa que celebre o Comité Asesor Externo.

### **Artigo 7. – Das Comisións do Comité de Dirección**

1. O Comité de Dirección actúa en pleno, a través do Comité Científico ou doutras comisións delegadas que se poidan crear.

O Comité Científico está presidido polo/a director/a e integrado polo/a subdirector/a que actuará como secretario/a, e integrado por un membro de cada un dos grupos de investigación vinculados ao centro e/ou representante dos investigadores individuais, se os houbese.

2. Sen prexuízo do disposto na alínea anterior, o Comité de Dirección poderá crear as comisións específicas que estimar convinte para o estudo, informe ou resolución de asuntos concretos.

### **Artigo 8. – Comité Asesor Externo**

1. O Comité Asesor Externo do CITIC estará integrado por un máximo de nove investigadoras e investigadores de recoñecido prestixio de fóra da UDC no eido das tecnoloxías da información e das comunicacións.

2. Os membros do Comité Asesor Externo serán nomeados polo/a reitor/a da UDC para un período improrrogable de seis anos a proposta do Comité Asesor Externo saínte, do Comité de Dirección e do Comité Científico do CITIC.

3. O Comité Asesor Externo escollerá de entre os seus membros aquela persoa que haxa de ostentar a presidencia.

4. O Comité Asesor Externo desenvolverá as funcións seguintes:

- a) Realizar cantos informes e propostas xulgar oportunos no relativo á política científica do centro.
- b) As demais que lle sexan atribuídas por este Regulamento ou polo Comité de Dirección do centro.

5. O Comité Asesor Externo celebrará como mínimo unha sesión ordinaria cada ano.

### **Artigo 9.- Dirección do CITIC**

1. O/a director/a do CITIC terá a cargo a súa dirección científica cunha dedicación total. Será nomeado/a polo/a reitor/a por períodos de catro anos, renovables, a proposta do/a vicerreitor/a de Política Científica, Investigación e Transferencia entre PDI en servizo activo e a tempo completo da UDC.

2. O director/a do CITIC terá dereito aos complementos retributivos e á redución docente establecidos para as persoas que ocupen a dirección ou o decanato das facultades e escolas da UDC.

3. A perda da condición de director/a do Centro prodúcese por renuncia, perda da condición de PDI ou da dedicación a tempo completo ou cesamento acordado polo/a reitor/a, a proposta do/a vicerreitor/a de Política Científica, Investigación e Transferencia.

### **Artigo 10.- Sub-dirección do CITIC**

1. O/a sub-director/a do CITIC, será nomeado/a polo/a reitor/a por un período de catro anos, renovables, a proposta do/a vicerreitor/a de Política Científica, Investigación e Transferencia entre PDI a tempo completo da UDC.
2. O/a sub-director/a do CITIC terá dereito aos complementos retributivos e á redución docente establecidos para as persoas que ocupen as direccións de departamentos da UDC.
3. A perda da condición de sub-director/a producirase polas mesmas causas previstas na alínea 3ª do artigo anterior.

## **TÍTULO III CONTROL E AVALIACIÓN**

### **Artigo 11.- Calidade**

1. O CITIC elaborará cada catro anos unha memoria das actividades realizadas ben como unha proposta de obxectivos estratéxicos para o período seguinte que inclúa indicadores específicos que permitan avaliar a actividade desenvolvida.
2. A memoria deberá incluír a avaliación da actividade do centro no período de referencia, dirixida polo Comité Asesor Externo de acordo co disposto no artigo 8.

### **Artigo 12. – Ética na Investigación**

O CITIC desenvolverá as súas actividades de conformidade cos estándares éticos máis elevados, baixo a supervisión do Comité de Ética na Investigación e na Docencia da UDC.

### **Artigo 13. – Contratación de Persoal**

O CITIC adoptará cantas medidas sexan precisas para asegurar que na contratación de persoal adscrito aos grupos e proxectos vinculados ao CITIC se cumpra a lexislación e os convenios colectivos de aplicación, ben como criterios de selección compatibles cos selos de excelencia obtidos polo centro e pola UDC, como o HRS4R da Comisión Europea.

#### **Artigo 14. – Igualdade de Xénero**

O CITIC aplicará con carácter transversal en todas as súas actividades políticas e medidas adecuadas para eliminar calquera desigualdade, directa ou indirecta, entre homes e mulleres, en coordinación coa Oficina para a Igualdade de Xénero da UDC.

#### **Artigo 15. – Normalización e Promoción da Lingua Galega**

De conformidade co Regulamento de Usos da Lingua Galega na UDC, o CITIC empregará o galego como lingua de uso normal no seu funcionamento e na súa proxección externa e promoverá de forma activa o uso da lingua galega nas actividades científicas que se desenvolvan no Centro.

### **TÍTULO IV BENS E INFRAESTRUTURAS**

#### **Artigo 16. - *Instalacións***

1. As instalacións do CITIC atópanse nos edificios CITIC e Anexo CITIC. O uso dos diferentes espazos estarán definidos pola dirección do Centro co informe favorable da Comisión de Dirección, previo informe favorable do/a vicerreitor/a de Investigación e Transferencia.
2. Os laboratorios que compoñen actualmente o CITIC, sen prexuízo de futuras ampliacións ou modificacións, son os que figuran no anexo II deste regulamento.
3. Mediante autorización ou concesión, segundo proceder, o CITIC poderá ceder o uso de espazos nas súas instalacións a empresas cuxa actividade estea relacionada coas tecnoloxías da información e das comunicacións.

### **TÍTULO V RÉXIME ECONÓMICO**

#### **Artigo 17.- *Xestión económica***

1. Os orzamentos da UDC conterán a dotación económica do CITIC.
2. Os gastos do CITIC serán autorizados pola dirección do Centro.

3. A xestión económica dos proxectos dos grupos ou investigadores individuais do CITIC será realizada consonte o establecido no *Regulamento para o recoñecemento de grupos e unidades de investigación e investigadores/as da UDC* ou normativa que o substitúa

### **DISPOSICIÓN FINAL**

Este regulamento entrará en vigor o día seguinte da súa publicación do Taboleiro Electrónico da UDC.

### **DISPOSICIÓN TRANSITORIA**

O Comité Asesor Externo previsto neste regulamento, constituirase no prazo máximo de seis meses a contar da súa entrada en vigor.



## ANEXO I

O CITIC conta con 2 edificios singulares, un de 1600m<sup>2</sup> e outro de 1900m<sup>2</sup> amoblados e preparados para o desenvolvemento de actividades de I+D+i no eido das TIC (teito e chan técnico, tomas de rede configurables, cobertura WIFI...) con salas de reunións de distintas características, dotadas con material audiovisual (proxector, encerado convencional, encerado interactivo) utilizadas como salas de traballo, videoconferencia, ou formación.

No edificio do CITIC atópanse dous CPDs á disposición dos grupos de investigación e das empresas asociadas. Un deles está situado na última planta do edificio principal e o outro na planta baixa do edificio de ampliación denominados CPD CITIC e CPD CITIC2.

Como apoio ás diversas liñas de investigación o CITIC conta coas seguintes instalacións:

- Laboratorio singular de Televisión Dixital.
- Laboratorio de Vídeo Dixital.
- Estación de emisión TDT (DVB-T, DVB-H).
- Laboratorio de imaxe médica.
- Laboratorio de Usabilidade ou Living Lab.
- Laboratorio Software Radio.
- Laboratorio de redes de sensores inalámbricas e hardware embebido.

## ANEXO II

GRUPOS de Investigación vinculados ao CITIC á data da sinatura deste Regulamento:

- Grupo de Arquitectura de Computadores; GAC
- Grupo de Tecnología Electrónica y Comunicaciones; GTEC
- Laboratorio de Bases de Datos; LBD
- Laboratorio de Investigación y Desarrollo en Inteligencia Artificial; LIDIA
- Modelos y Métodos Numéricos en Ingeniería y Ciencias Aplicadas; M2NICA
- Modelos y Aplicaciones de Sistemas Distribuidos; MADS
- Modelización, Optimización e Inferencia Estadística; MODES
- Redes de Neuronas Artificiales y Sistemas Adaptativos; RNASA
- Visión Artificial y Reconocimiento de Patrones; VARPA
- Laboratorio de Recuperación de Información; IRLAB
- Lengua y Sociedad de la Información; LYS
- Laboratorio Interdisciplinar de Aplicaciones de la Inteligencia Artificial; LIA2
- TELEMÁTICA o Inteligencia Telemática; TELEMÁTICA